

Opitz, Martin: Liedt (1624)

1 Mein feines Lieb ist fern von mir/
2 Ich hat mit jhr sehr kurtze frewdt/
3 Sehr kurtze frewdt hat ich mit jhr/
4 Das macht mir desto grösser leidt/
5 Mein Tag bring ich mit seusstzen zu/
6 Mitlauter Vnruh meine Ruh:
7 Mein Hertz hat sie genommen mit/
8 Es halff kein Klag/ es halff kein Bitt.

9 Ihr seuftzen/ ach jhr seuftzen mein/
10 Die jhr so heüfig eilt von mir/
11 Fahrt hin zu meinem Liebelein/
12 Fahrt hin/ vnd sagt der Edlen Zier/
13 Daß jhr getrewer Diener sich
14 Vmb sie bekümmer inniglich/
15 Ohn vnderlaß insolchem schmertz
16 Gedencket an jhr Keusches Hertz.

17 Gleich wie ein Turtelteubelein/
18 Das sein Gesellen hat verlohrn;
19 So sitz ich trawrig vnd allein/
20 Das schwinde scheiden thut mir zorn/
21 Ach scheiden/ ach zum letzten mahl
22 Da fing erst an die rechte Qual/
23 Zum letzten mahl da sie fort ruckt/
24 Mein Hertz ich in jhr Lefftzen truckt.

25 Ich hab euch jwar so lang erwehrt/
26 Daß mich kein Jungfraw fangen solt/
27 Nun seh ich wohl/ euch ist beschert/
28 Daß ich euch muste werden holdt/
29 Ihr ward diejenig/ jhr allein/
30 Ihr seyt es vnd jhr solt es sein/

31 Die mich durch jhre lieblichkeit

32 Vnd Tugent also hat verleit.

33 Ach liebstes Lieb/ kehrt wieder vmb/

34 Kehrt vmb/ ach liebstes Liebelein/

35 Eh dann ich gantz vnd gar vmbkumb/

36 Vnd geb mir nur ein Zeichen klein/

37 Kan es nit mit dem Leibe sein/

38 So last es doch ein Schreiben sein/

39 Hab ich so vil genad bey euch/

40 So frag ich nach keim Königreich.

(Textopus: Liedt. Abgerufen am 23.01.2026 von <https://www.textopus.de/poems/10757>)